

Evening Dogri (NSD) Bulletin 03-07-2025

आकाशवाणी

भारत-घाना ते अपने आपसी रिश्ते व्यापक भागीदारी तोड़ी बधाने दा लैता फैसला, प्रधानमंत्री नरेन्द्र मोदी होरें घाना दी संसद गी अज्ज दपैहरी कीता संबोधत।

विदेश मंत्री डॉ. एस.जयशंकर होरें आतंकवाद पर भारत दे धेड़्यै दा साथ नेई देने बारे पच्छमी देशें गी कीता सुआल, आतंकवाद खलाफ इकजुट वैश्विक प्रतिक्रिया दी जरूरत जताई।

केन्द्री मंत्री सिंधिया होरें आखेआ भारती डाक बड़े बड़डे तकनीकी बदलाव थमां गुजरा दी ऐ।

सरकार नै परतियै किशस पाकिस्तानी कलाकारें ते क्रिकेटरें दे सोशल मीडिया अकाउंट पर रोक लाई।

हिमाचल प्रदेश पिछले 12 दिनें च खरी मती बरखा पौने करी 65 लोकें दी मौत। मौसम विभाग ने राज्य दे 6 जिलें च हाड़ दी चेतावनी जारी कीती।

<><><><><><>

PM Ghana Visit

प्रधानमंत्री नरेन्द्र मोदी घाना दी सरकारी यात्रा पर कल रातीं अक्रा पुज्जे। घाना दे राष्ट्रपति जॉन ड्रॉमनी महामा होरें हवाई अड्डे पर श्री मोदी हुं'दा औपचारिक स्वागत कीता ते उ'नेंगी गार्ड ऑफ ऑनर सने 21 तोपें दी सलामी दित्ती गई। मगरा दौनें नेताएं सीमित ते प्रतिनिधिमण्डल स्तरै दी गल्लबात कीती। गल्लबात मगरा जारी सांझे बयान च श्री मोदी होरें घोषणा कीती जे उ'नें भारत-घाना भागीदारी गी व्यापक भागीदारी दा रूप देने दा फैसला कीता ऐ। दौनें धड़ें, बपार, रास-पूंजी, राई-बाई, डिजिटल तकनीकें, समर्थ निर्माण, ढांचागत विकास ते लोकें बश्कार संपर्क आहले खेत्तरें सैह्योग बधाने बारे बी चर्चा कीती। एहदे अलावा उ'नें घाना च बधदे दपक्खी बपार ते भारत दी रास-पूंजी दा सोआगत कीता ते कन्नै रक्षा खेत्तर च सैह्योग बारे बी चर्चा कीती। गल्लबात दे मगरा दौनें मुख्यें, संस्कृति, मानकें, आयुर्वेद ते रिवायती दोआइएँ आहले खेत्तरें च चार सैह्यती पत्तरें पर दस्तख्त बी कीते। एहदे परैन्त घाना दे राष्ट्रपति जॉन ड्रॉमनी महामा होरें प्रधानमंत्री मोदी हुं'दे सम्मान च आयोजित इक कार्यक्रम दरान श्री मोदी होरें'गी घाना दे सम्मनें शा उच्चे सम्मान 'ऑफिसर ऑफ द आर्डर ऑफ द स्टार ऑफ घाना'कन्नै सम्मानित कीता। मोदी हुं'दे आसेआ आलमी सतह उप्पर कीते गेदे जतनें दे चलदे उ'नेंगी एह सम्मान दित्ता गेआ ऐ। प्रधानमंत्री होर अपने 5 राष्ट्र दे दौरे दे चलदे अज्ज रातीं त्रिनिदाद ते टोबेगो दे राष्ट्रपति क्रिस्टिन कारला कैंगालू ते प्रधानमंत्री कमला प्रसाद बिस्सेसर हुं'दे कन्नै गल्लबात करगन ते दपक्खी रिश्ते गी मता गूढ़ा करने आले पोर्ट ऑफ स्पेन च चर्चा कीती जाग। अपने दौरे दरान मेद जताई जा'रदी ऐ जे प्रधानमंत्री होर त्रिनिदाद ते टोबेगो दी संसद दे संयुक्त सत्र गी संबोधत करगन ते उत्थें रवा'रदे भारती समुदाय कन्नै गल्लबात करने दा कार्यक्रम बी ऐ।

<><><><><><>

EAM

विदेश मंत्री डॉ. एस.जयशंकर होरें पच्छमी देशें थमां भारत गी आतंकवाद गी लेइयै सैह्योग गी देने बारे सुआल कीते न ते खरी मती इकजुट वैश्विक प्रतिक्रिया देने पर जोर पाया। वाशिंगटन च डॉ. जयशंकर होरें आखेआ जे एह सच्चाई ऐ जिसलै कोई दुआ देश आतंकवाद

दा शकार बनदा ऐ तां बाकी दे देश ओहदे खलाफ नेई खड़ोते, ओह उसलै गै किश करदे न जिसलै ओह आपूं शिकार बनन।

<><><><><><>

Amarnath Yatra

अज्जै थमां औपचारिक तौरा उप्पर शुरू होइ दी सलाना 38एं दिनें दी श्री अमरनाथ जी दी यात्रा अनंतनाग जिले दे पहलगाम ते गांदरबल जिले दे बालटाल राएं सुचारू ढंगै कन्नै चला करदी ऐ। अज्ज बडलै दौनें रस्ते राएं सख्त सुरक्षा बंदोबस्ते हेठ यात्रा शुरू होई। अज्ज बडलै पहलगाम रस्ते राएं 3 ज्हार शा मते श्रद्धालुएं गी चंदनवाड़ी आली बक्खी जाने दी अनुमति दित्ती गई। जिसलै केह बालटाल बेस कैप थमां पवित्र गुफा लेई 9 ज्हार शा मता श्रद्धालुएं गी अनुमति दित्ती गई।

<><><><><><>

Div.Com Yatri Niwas

श्री अमरनाथ जी दी यात्रा गी दिक्खदे होई सारे श्रद्धालुएं जम्मू दे भगवती नगर आले आधार शिविर पुज्जा'रदे न। एहदे चलदे जम्मू दे डिवीजनल कमीशनर रमेश कुमार, डिप्टी कमीशनर सचिन कुमार वैश्य ते आईजीपी जम्मू भीम सेन टूटी होरें आधार शिविर दा चिरें रातीं दौरा लाया ते श्रद्धालुएं कन्नै मलाटी कीती। इस दरान उनें आधार शिविर च कीते गेदे इंतजामें दा जायजा लैता। उनें सारे सरबंधी मैहकमें कन्नै महत्वै आली बैठक बी लाई। उनें अधिकारिणें गी हिदायत कीती जे ओह इस गल्ला गी जकीनी बनान जे श्रद्धालुएं गी कुसै चाल्ली दी परेशानी नेई झल्लनी पवै।

<><><><><><>

SMVD Pilgrim

त्रिकुटा पहाड़िणें च स्थित श्री माता वैष्णो देवी जी दी यात्रा पर मुख्य भरै दे अलावा बाहरले मुख्यें थमां बी श्रद्धालु औंदे न। श्राईन बोर्ड दी अधिकारिक जानकारी मूजब इस ब'रे पैहली जनवरी मगरा 30 जून तगर 42 लक्ख 9 ज्हार 28 श्रद्धालुएं पवित्र गुफा च मत्था टेकेआ। छड़े जून म्हीने च गै 9 लक्ख 26 ज्हार श्रद्धालुएं पवित्र गुफा च मत्था टेकेआ ते आशीवाद लैता।

<><><><><><>

Defence

रक्षा खरीद परिषद नै रक्षा मंत्री राजनाथ सिंह हुंदी अध्यक्षता च स्वदेशी जरियै कन्नै 1 लक्ख करोड़ शा मती राशि दे 10 पुंजी अधिग्रहण प्रस्तावेदी मंजूरी दित्ती। इस मंजूरी हेठ थेआरें आली रिकवरी च इस्तेमाल होने आली गडिडया, इलैक्ट्रानिक वारफेयर प्रणाली, जमीन थमां हवा तोड़ी वार करने आली मिसाइलां बगैरा शामिल न। रक्षा मंत्रालय मताबक इनें चीजें दी आपूर्ति कन्नै हवाई रक्षा प्रणाली मती कारगर, चीजें दी आपूर्ति दा प्रबंधन बेहतर ते प्रतिक्रिया सरबंधी तैआरिणें विकसित होंगन। मूर्ड माइन्स, सुरंगे थमां बचाह आले उपकरण ते होर दूएं दी खरीद आस्तै मंजूरी दित्ती चुकी दी ऐ।

<><><><><><>

India Post

केन्द्री संचार मंत्री ज्योतिर्यादित्य सिंधिया होरें आखेआ ऐ जे भारती डाक च बड्डे पैमाने पर तकनीकी बदलाव कीते जा'रदे न। आकाशवाणी समाचार कन्नै इक खास इंटरव्यू च मंत्री होरें आखेआ जे पैहली बारी इस संगठन च मुख्य तकनीकी अधिकारी दी नियुक्ति कीती जा'रदी ऐ। उनें जोड़ेआ जे सीटीओ नमीं तकनीकी विकास बारे कम्म करोग। एह खास इंटरव्यू 100.1 आकाशवाणी एफएम गोल्ड चैनल पर अज्ज रातीं 9 बजे प्रसारत कीता जाग। एह इंटरव्यू इससै यूट्यूब न्यूज ऑन एआईआर आफिशल पर बी दिक्खेआ जाई सकदा ऐ।

<><><><><><>

US Night Club

अमरीका च कल रातीं चिरे शिकागो नैहर कश इक गोलियां चलाने दी घटना च 4 लोक मारे गे ते 14 जख्मी होई गे न। मीडिया दी जानकारी मताबक 3 जनें दी हालत नाजुक ऐ। एह वारदात इक रेस्ट्रा दे बाहर पेश आई जित्थें रैपर मैलो बक्कर दी एलबम रिलीज दा कार्यक्रम हा। चानचक्क इक गड्डी उत्थें आंदी ऐ ते ओह अंदरा इक बंदूकदारी किट्ठ पर गोलिया चलाइयै नस्सी जंदा ऐ। पुलस दा आखना ऐ जे अजें तोड़ी कोई गिरफ्तारी नेई होई ऐ ते जांच जारी ऐ।

<><><><><><>

Shivraj Homes

राई-बाई सरबंधी केन्द्रीय मंत्री शिवराज सिंह चौहान होरें आखेआ जे जम्मू कश्मीर च तकरीबन 5 लक्ख लोक इसलै ऐसे न जिंदे कश अपना मकान नेई ऐ। उनेंगी केन्द्र सरकार दी स्कीम तैहत घर उपलब्ध करोआए जांगन। प्रधानमंत्री होरें फैसला कीता ऐ जे जिनें लोकें कश अजें बी घर नेई हैन, उनेंगी घर उपलब्ध करोआया जाग। एह गल्ल मंत्री होरें श्रीनगर च इक प्रेस कांफ्रेंस गी संबोधत करदे होई आक्खी। उनें आखेआ जे असें इक सर्वे करोआया ऐ ते तस्दीक करने आली प्रक्रिया जारी ऐ। चौहान होरें आखेआ जे जिसलै इक बारी तस्दीक करने आला कम्म मुक्कमल होई जाग तां घरें दी अलॉटमेंट आला कम्म शुरू होग।

<><><><><><>

Search Operation

किश्तवाड़ जिले दे जंगली इलाकें च छप्पे दे आतंकवादिगं गी फगड़ने लेई तपाशी अभियान जारी ऐ। कल कुच्चल छात्रु इलाके च सुरक्षाबलें ते आतंकवादिगं बश्कार टाकरा तपाशी अभियान दरान होआ। इस अभियान दरान ड्रोन ते खौजी कुत्तें दी बी मदद लैती जा'रदी ऐ ते बाद्धू सुरक्षाकर्मी बी लाए गेदे न। सेना-सीआरपीएफ आस्सेआ इलाके च आतंकवादिगं दी मजूदगी बारे टकोहदी सूह थोने पर तपाशी अभियान चलाया गेआ हा।

<><><><><><>

Jhangar Day

झंगड़ बटालियन नै 1948 च इस्सै दिन भारत पाक युद्ध दरान सर्वोच्च बलिदान देने आले ब्रिगेडियर मोहम्मद उस्मान एमवीसी हुंदी पुण्यतिथि मनाई ते श्रद्धांजलि अर्पित करदे होई झंगड़ दिवस मनाया। “नौशेहरा शेर” दे तौरा पर जाने जाने आले ब्रिगेडियर उस्मान ते झंगड़ दी लड़ाई च जम्मू कश्मीर दी अगुवाई करदे होई लड़ाई दा रूक्ख मोड़ी ओड़ेआ हा। उस्मान स्मारक च कमांडर, 80 इनफैंट्री ब्रिगेड ते बाल सैनिक बसंत सिंह हुंदे आस्सेआ कब्रिगेडियर उस्मान ते राष्ट्र लेई जान नौशावर करने आले बहादुर जवानें गी श्रद्धांजलि अर्पित कीती। इस मौके पर उस्मान मैमोरियल वैबसाइट www.usman_memorial.in दा डिजिटलप्लेटफार्म बी शुरू कीता गेआ।

<><><><><><>

Mango

उद्योग ते वाणिज्य मंत्रालय नै अबूधाबी च भारती कृषि उत्पाद दी मजूदगी बधाने दे मकसद कन्नै उत्थें मैंगो प्रमोशन प्रोग्राम अम्ब दे प्रचार आस्तै कार्यक्रम दा सरिस्ता कीता। इस दरान इंडिया मैंगो मानिया 2025 दा आयोजन यूएई च भारती दूतावास ते लूलू ग्रुप दे सैह्योग कन्नै कीता गेआ। मंत्रालय नै आखेआ जे इस कार्यक्रम दा मकसद दुनिया भरै दे उपभोक्ताएं गी भारत च पाए जाने अंबे दी उंदा किस्में बारे दस्सना, खास करियै यूएई ते खाड़ी क्षेत्र च रवा'रदे भारतीयें गी। अंब दी खास किस्में च बनारसी लंगड़ा, दशैहरी, चौसा, आम्रपाली, माल्टा ते मल्लिका शामिल हियां। भारत नै पिछले ब'रे 20 मिलियन डॉर दी कीमत च 12 जहार टन अंब यूएई गी निर्यात कीते हे।

<><><><><><>श

Pak-Social Media

सरकार नै परतियै किश पाकिस्तानी कलाकारें, क्रिकटरें दे सोशल मीडिया अकाउंट्स भारत च बैन करी दित्ते न। सूत्रें मूजब इन्हें अकाउंटें तोड़ी किश तकनीकी खराबी करियै पुज्ज बनाई गई ही। इस ब'रे मई च सरकार दे कश पाकिस्तानी यूट्यूब चैनल ते सोशल मीडिया अकाउंट बंद करी दित्ते हे, जेकर ओ भारत बिरोधी प्रापोगेंडा ते उकसाने आली चीजें दा प्रचार प्रसार करा'रदे हे। इंदे च सेवा कमर, अहद रजा मीर, युमता जैयदी ते दानिश तैमूर दे इंस्टाग्राम अकाउंट ते क्रिकेटर शाहिद अफरीदी ते शोएब अख्तर दे यूट्यूब चैनल शामिल हे।

<><><><><><>

HP Rain

भारी बरखा, बढ़ल फटने, हाड़ औने ते पस्सी पौने करी हिमाचल प्रदेश दे आम जनजीवन च खलल पेई गेआ ऐ। 20 जून थमां मती बरखा पौने सरबंघत घटनाएं च 63 जानें दा नुक्सान 109 लोक घायल ते 40 लोक अर्जे बी लापता न। मौसम विभाग ते राज्य च अज्ज ते कल आस्तै किश थाहरें पर यैलो अलर्ट जारी कीता ऐ। कुल्लु जिले च स्नो गैलरी कोल हाड़ औने करी मनाली-कैलोग लेह जरनैली शिड़क पर गडिडएं दी आओजाई पर असर पेआ ऐ। मनाली दे डीएसपी के.डी.शर्मा हुंदी तरफा दित्ती जानकारी मूजब कैलोग बक्खी दी ट्रैफिक गी रोहतांग पास बक्खियां मोड़ी दित्ता गेआ ऐ। तोआई सीमा सड़क संगठन शिड़कें दे कम्मं च लग्गे दा ऐ।

<><><><><><>श

Uttarakhand Rain

मुसलाधार बरखा पौने करी उत्तराखंड च नस्सियां पौने करी चार धाम यात्रा दा रस्ता बी बंद होई गेआ ऐं कल रातीं तकरीबन 40 कैदारनाथ यात्रु सोनप्रयाग च फसी गे हे जिने राज्य आपदा प्रबंधन बल नै सुरक्षत बाहर कड्डेआ। रस्ता अजें बी बंद ऐ ते शिड़क टीक करने दा कम्म जारी ऐ।

<><><><><><>

IMD

भारती मौसम विभाग नै अज्ज मती थमां खरी मती बरखा अरुणाचल प्रदेश, पूर्वी मध्य प्रदेश, गुजरात, मिजोरम ते त्रिपुरा दे किश हिस्सें च पौने दी पेशगोई कीती ऐ। आकाशवाणी समाचार कन्नै गल्लबात करदे होई वरिष्ठ मौसम विशेषज्ञ आर.के.जेनामती होरें आखेआ जे बड़ी मती बरखा पौने दी मेद कन्ने कोंकण, गोवा, मध्य महाराष्ट्र, पूर्वी राजस्थान ते कर्नाटक च अज्ज रैड अलर्ट जारी कीता गेआ ऐ।

<><><><><><>

Kishtwar Sarthal Yatra

किश्तवाड जिले च अज्ज सलाना माता सरथल देवी जी दी यात्रा पूरे उत्साह ते भक्तिभाव कन्नै शुरू होई। एह यात्रा हवन कन्नै शुरू होई। एह हवन गोरी शंकर मंदर सरकूट च होआ जित्थें श्रद्धालुएं पूर्ण आहूती दित्ती। इस मौके इक शोभा यात्रा कडडी गई जेहड़ी चौगान मैदान, शहीदी चौक ते बस स्टेंड थमां होंदी होई निकली। ज्हारां बद्धे श्रद्धालु जिंदे च मर्द, महिला ते बच्चे शामिल हे, उनें पूरे उत्साह कन्नै एहदे च हिस्सा लैता।

<><><><><><>

World Police

जम्मू कश्मीर पुलस दी सेंट्रल स्पोर्ट्स कुश्ती टीम दा प्रतिनिधित्व करने आले कांस्टेबल बेनियामिन ते इशाक अहमद होरें अमरीका च होआ'रदे विश्व पुलस ते फायर गेम्स च सुन्ने दा तगमा जित्तिथै जम्मू कश्मीर दा मान बघाया ऐ। बेनिया होरें इस मिमां पैहले ऑल इंडिया पुलस किश्मी चैंपियनशिप 20253 च कैह दा तगमा जित्तेआ हा ते एहदे बाद 2024 च सुन्ने दा तगमा हासल कीता हा। जम्मू कश्मीर पुलस दे वरिष्ठ अफसरें दौनें पहलवानें गी दिली मुबारकबाद दिंदे होई अंतराष्ट्रीय मंच उप्पर उंदी सफलता दी सराहना कीती।

<><><><><><>